

Minister Oduber:

‘Si financiamiento Hard Rock no keda cla, lo no extende’

ORANJESTAD — Aruba Investment Bank (AIB) su garantia pa proyecto di Hard Rock Hotel ta caduca fin di augustus y ta final. Minister di Turismo Otnar Oduber ta reitera esaki na Bon Dia Aruba. Si desaroyado Southwest Horeca no keda cla, lo no extende.

E mandatario su respuesta riba pregunta di Bon Dia Aruba ta conciso. “Cu ami sa AIB ta esun cu a duna garantia te fin di Augustus. Y gobierno a mara deadline na nan.” E deadline ta final.

“AIB a duna e ultimo 3 luna nan y a bisa tambe cu no lo extende esaki mas.” Na cuminsamento di juli, minister Oduber tabata indica ainda cu si Southwest no keda cla na ora, ainda lo por tin chens pa extende si acaso tin prueba cu nan a haci progreso den nan financiamiento. Pero ayera e minister a muestra di ta resuelto den su palabranan.

Falta 60 porciento



Na juni e holoshi a cuminsa tik pa e desaroyado pa keda cla cu e financiamiento di e proyecto di hotel cu lo bin unda awo ruina di Bushiri Hotel ta para ainda. Accionistanan lo a pone 40 porciento riba nan mesun forsa y Southwest Horeca y AIB lo a pone un performance bond di 8 miyon florin hunto riba mesa.

Pa e resto di e placa nan tin pues te fin di augustus. E ora ey numa por bay notario, pasa

e erfpacht pa Southwest Horeca y cobra e performance bond. Unabes cu esaki a tuma luga, e desaroyado tin un luna pa tumba e edificio bieu di Bushiri, haci'e limpi y prepara pa construccion di e Hard Rock Hotel y e centro di educacion hotelero cu tambe lo mester bin eynan.

Si acaso no keda cla y Southwest definitivamente ta cay afo, ainda tin un di dos interesado pa traha un hotel eynan. Cuminsamento di luna

aki, Sheraton a duna di conoce na gobierno cu ainda nan ta interesa. Un otro opcion ta keda cu gobierno mes ta tumba e hotel, haci'e limpi y ta traha un beach publico na e sitio. Pa esaki por cierto tin un mocion acepta caba den parlamento.

De Ruyter

Mientras tanto, opositornan ta keda pone presion riba e asunto aki. Partido extraparlamentario UPP ta sostene carta di ex-director di Ahata Jan de Ruyter, den cual e ta alega entre otro cu minister Oduber lo a duna e proyecto na Southwest Horeca pasobra famia di ex-minister di Finanzas Tico Croes lo tabata envolvi.

Tico Croes mes te hasta lo tabata na cabes di e compania. De Ruyter ta acusa minister Oduber di fraude y lo a bisa cu e lo tuma contacto cu Ministerio Publico. Sinembargo, Bon Dia Aruba a haya di compronde for di fiscal mayor Peter Blanken cu esaki no a tuma luga ainda. □